

十四春秋卷第三

仁和吳任臣志伊氏撰

鄴城牛 與潛子氏闕

昭文周 昂少霞重刊校

吳三

睿帝本紀

睿帝名溥

冊府元龜作浦今從五代史

太祖第四子也

五國故事又云第十七

武義元年封丹陽郡公

五國故事作丹陽王非

二年宣帝既薨六

月戊申溥即吳王位尊母王氏曰太妃秋七月改昇州

大都督府為金陵府拜徐溫金陵尹冬十二月金陵城

成建紫極宮於治城故址

順義元年春正月王遣使勸晉王稱帝二月改元赦境  
內三月歸錢鎰於吳越吳越亦遣李濤來歸是月以濤  
爲右雄武統軍夏五月丙戌朔梁改元龍德六月乙酉  
朔日有食之冬十月徐溫勸王南郊或言禮樂未備且  
唐祀南郊其費巨萬今未能辦溫曰安有王者而不事  
天乎吾聞事天貴誠多費何爲唐每郊祀啟南門灌其  
樞用脂百斛此乃季世奢泰之弊又安足法甲子王祀  
天於南郊配以太祖乙丑御天興樓大赦拜徐溫太師  
嚴可求右僕射加徐知誥同平章事領江州觀察使尋

以江州爲奉化軍以知誥領節度使徵壽州團練使崔太初爲右雄武大將軍

順義二年

月命官興販簿定租稅厥田上上者每

頃稅錢二貫一百文中田一頃稅錢一貫八百文下田一頃稅錢一貫五百文皆輸足陌見錢若見錢不足許依市價折以金銀并計丁口課調亦科錢以爲率守員外郎宋齊邱上策曰江淮之地自唐季以來爲戰爭之所今兵革乍息毗黎始安而必率以見錢折以金銀斯非民耕桑可得也將興販以求之是教民棄本而逐末耳乞虛升時價悉收穀帛本色爲便是時絹每匹市價

五百文紬六百文綿每兩十五文請匹絹升爲一貫七  
百文紬爲二貫四百文綿爲四十文皆足錢又請蠲丁  
口錢朝議喧然沮之以爲如此則縣官歲失錢億萬計  
齊邱曰安有民富而國家貧者邪乃致書於徐知誥謂  
明公總百官理大國督民見錢與金銀求國富庶所謂  
擁篲救火撓水求清欲火滅水清可得乎知誥得書曰  
此勸農上策也卽行之自是不十年間野無閒田桑無  
隙地按通鑑天祐十五年知誥以宋齊邱爲謀主先是  
吳有丁口錢又計畝輸錢致錢重物輕民甚苦之  
齊邱以爲錢非耕桑所得使民輸錢是教之棄本逐末  
也請蠲丁口錢自餘稅悉輸穀帛紬絹匹直千錢者當  
稅三千知誥從之由是江淮間曠土盡闢桑柘滿野  
國以富彊今從許載吳唐拾遺錄採入順義年中是

歲以同泰寺之半置臺城千福院改瓦官寺爲昇元寺

一作吳興寺

閣爲昇元閣大封王躬又爲海軍統帥王建所

弑建自立爲王復稱高麗

順義三年夏四月己巳晉王卽皇帝位國號唐改元同

光冬十月辛未朔日有食之己卯梁亡戊戌唐以滅梁

來告始稱詔我國不受唐主隨易書用敵國禮曰大唐

皇帝致書於吳國主

按來聘者爲引進副使楊彥詢

王遣司農卿盧蘋

獻金器二百兩銀器三千兩羅錦一千二百疋龍腦香

五斤龍鳳絲鞵一百事於唐又遣使張景報聘稱大吳

國主上書大唐皇帝辭禮如牋表徐知誥以王命遣滁

州刺史王稔巡霍邱因代鍾泰章爲壽州團練使左遷  
泰章饒州刺史時有告泰章侵市官馬故有是命已而  
徐溫言吾非泰章死張顥久矣今日富貴安可負之命  
知誥爲子景通娶其女以解之冬十二月甲申復遣盧  
蘋獻方物於唐上唐太后金花銀器衣段是時嚴可求  
預料唐主之言教蘋應對既至皆可求所料唐主歷

問我國大臣尤多周本以爲忠勇

江表志云嚴球爲相王慎辭奉使北朝球

在病請告烈祖授以論答凡數百事皆中機務更就球宅訪之球覽畢稱美請更添數事北朝問黑雲長劍多少來時及五十指揮皆在都下柴再用不曾赴鎮既而果首問黑雲長劍並柴再用所云慎辭依前致對按志所載卽此事之譌也誤以嚴可求爲球盧蘋爲王慎辭

順義四年春三月王遣右衛上將軍許確進賀郊天銀  
二千兩錦綺羅一千二百疋細茶五百斤象牙四株犀  
角十株于唐夏四月丙寅遣使獻唐方物秋八月遣右  
威衛將軍雷峴獻新茶于唐九月壬寅以唐太妃喪獻  
慰禮銀絹二千冬十月王如白沙觀樓船太學博士王  
穀上書請改白沙爲迎鑾畧曰日月所經星辰盡爲黃  
道鑾輿所止并邑皆爲赤縣王命更其名曰迎鑾鎮徐  
溫自金陵來朝十二月遣賀正使王權進唐金花銀器  
綿絲千段泊太后禮物是歲徐溫建興敎寺於石頭城  
順義五年夏四月癸亥朔日有食之六月鎮海節度判

官楚州團練使陳彥謙卒冬十二月吳越王鏐遣使者  
沈瑫以受唐玉冊封吳越國王來告王以其國名相同  
與之絕閏月乙卯遣雷峴獻賀正禮幣于唐是歲唐遣  
諫議大夫薛昭文使福州假道江西鎮南節度使劉信  
宴於郊次信宿而去是時唐遣通事舍人薛仁謙凡三  
聘於我

順義六年春二月辛亥遣右驍衛將軍蘇虔獻金花銀  
器錦綺於唐三月以左僕射同平章事徐知誥爲侍中  
右僕射嚴可求兼門下侍郎同平章事夏四月丙午唐  
主昶李嗣源卽皇帝位甲寅改元天成是月王遣使獻

新茶于唐五月丁卯詔爲同光王輟朝七日秋七月北

海前進士韓熙載來歸熙載上行止狀云熙載本貫齊州隱居嵩岳雖叨科第且晦姓

名今則慕義來朝假身爲賈賈既及疆境合貢行藏愚聞

釣巨鰲者不投取魚之餌斷長鯨者非用割雞之刀是

故有經邦治亂之才可以踐股肱輔弼之位得之則佐

時成績救萬姓之焦熬失之則遁世藏名臥一山之蒼

翠某妄思幼稚便異諸童竹馬蒿弓固閑親于好弄杏

壇槐里寧不倦于修身但勵志以爲文每棲身而學武

得麟經于泗水寧怪異圖授豹畧于邳圯方酣勇戰占

惟奇骨夢以生松敢期墜印之文上媿擔簦之路於是

櫻龍領編虎鬚繕獻捷之師徒築受降之城壘爭雄筆

陣決勝詞鋒運陳平之六奇飛魯連之一箭場中勅敵

不攻而自立降旗天下鴻儒遙望而盡摧堅壘橫行四

海高步出羣姓名遽列於烟霄行止遂離於塵俗且口

有舌而手有筆腰有劍而袖有鉞時方亂離迹猶飄泛

徒以術精韜畧氣激雲霓箕口張而陰電搖怒吻發而

暑雷動神驅鬼殿天蓋地車闢霹靂於雲中未爲躡捷

喝擣蒲於筵上不是口豪蘊機權而自有英雄仗勁節

而豈甘貧賤但攘袂叱咤拔劍長嗟不偶良時孰能言  
志旣逢昭代合展壯圖伏聞大吳肇基聿修文教聯顯  
懿于中土走明恩于外方萬邦咸貞四海如砥燹和天  
地巖廊有禹稷臯陶洒掃烟塵藩翰有韓彭衛霍豈獨  
漢稱三傑周舉十人凝王氣於神都吐祥光於丹闕急  
賢共理俾漢氏之懸科待旦旁求類周人之設學而又  
鄰邦接畛敵境連封一條雞犬相聞兩岸馬牛相望彼  
則待之以力數年而頻見傾亡此則禮之以賢一坐而  
更無騷動由是見盛衰之勢審吉凶之機得不上一順天  
心次量人事且向陽背暗捨短從長聖賢所圖古今一  
致然而出青山而褰足渡長淮而棄繻派遙終赴於天  
池星遠須環於帝座是攜長策來詣大朝伏惟司空楚  
劍倚天秦松發地言雄武則平窺絳灌語兵機則高掩  
孫吳經受素玉書傳元女莫不鞭撻宇宙驅役風雷勞  
愁積而腥肉生憤氣激而臂鬬起一怒而豺狼竄攝再  
呼而神鬼愁驚槌蠻鼓而簸朱旗雷奔電走掉燕鯨而  
揮自亦斗落星飛命將拉龍使兵合虎可以不克策馬常時  
可以後殿功乃非矜國家賴如股肱邊境用爲堡障動藏  
盟府名鏤景鍾今則化舉六條地方千里示之以寬猛

化之以溫恭繕甲兵而耀武威綏戶口而卹農事漫洒  
隨車之雨洗活嘉田輕搖逐扇之風吹消殄氣可謂仁  
而有斷謙而逾光賢豪向義以歸心姦宄望風而屏迹  
佇見秉旄仗鉞列土分茅修我貢以勤王控臨四海率  
諸侯而定霸彈壓八方遐邇具瞻威名洽著況復設庭  
燎以待士開雪宮以禮賢前席請論其韜鈴危坐願聞  
于興廢古今英傑孰可比方某才越通洩已觀至化及  
陳上謁罔棄謏才是敢輒述行藏鋪盡毫幅況聞鳥有  
鳳魚有龍草有芝泉有醴斯皆嘉瑞出應昌期某處士  
倫謬知人理是以副明君之獎善恢聖代之樂賢昔婁  
敬布衣上言于漢祖曹翽草澤陳謀于魯公失范增而  
項氏不興得呂望而周朝遂霸使遠人之來格實至德  
之克昭謹具行止如前伏請准式順  
義六年七月歸進士韓熙載狀  
八月乙酉朔日食  
是歲追爵大丞相徐溫四代祖考立廟於金陵

乾貞元年春正月馬軍都指揮使柴再用戎服入朝爲  
御史所彈再用恃功不服徐知誥陽於便殿通起居退

而自劾王優詔不許知誥固請奪俸一月以肅朝綱三月唐劉訓楚許德勳會兵侵荆南南平王季興乞師於我王遣水軍援之夏四月遣雷峴進白金羅綺於唐修重午之禮五月南平王季興請舉鎮來附徐溫曰洛陽去江陵不遠唐人襲之甚易我泝流救之甚難夫臣人而勿之救能無媿乎乃受其貢物聽其稱藩於唐秋八月己卯朔日有食之九月遣使如唐獻應聖節金器百兩金花銀器千兩雜色綾錦千疋冬十月丁亥唐主至滎陽民間訛言唐主自將入寇唐宣武節度判官孫晟

來奔

江南錄作孫忌今從周世宗實錄及通鑑

徐知誥客之辛丑大丞相都

督中外諸軍事諸道都統鎮海寧國節度使兼中書令  
東海王徐溫卒先是溫子行軍司馬忠義節度使同平  
章事知詢數欲代知誥執政嚴可求徐玠亦以爲請溫  
以知誥孝謹不忍謂知詢曰汝曹不如也陳夫人亦曰  
知誥乃貧賤時養之奈何富貴棄之

五國故事云徐溫常入覲于王至知

誥之第侍奉彌謹初更溫睡覺見有待於牀前者問之曰知誥溫因遣其休息知誥不退及再寤又見之乃曰汝自有政事不當如此以廢公家務知誥乃退及溫中夕而興見一女子侍立問之曰知誥新婦亦勞而遣之宅曰謂諸子曰事在可求等言之不已會溫欲帥諸藩二哥矣當善事之

鎮入朝勸王稱帝將行有疾乃遣知詢奉表勸進因留  
代知誥執政知誥草表欲求洪州節度使俟旦上之是

夕溫凶問至乃止知詢亟歸金陵王贈溫齊王諡曰忠武十一月庚戌王御文明殿卽皇帝位追尊孝武王曰武皇帝景王曰景皇帝宣王曰宣皇帝廟號高祖甲子大赦改元丙子尊太妃王氏曰皇太后以徐知詢爲諸道副都統鎮海寧國節度使兼侍中加徐知誥都督中外諸軍事封潯陽公

陸游張延翰傳以知誥領江州未時封潯陽侯今從馬令南唐書

幾改豫章公是月唐臣安重誨議乘徐溫之死來入寇且問舉大號之罪唐主不從十二月帝立兄廬江公濠爲常山王弟鄱陽公澈爲平原王兄子南昌公琪爲建

安王

乾貞二年春正月丁巳帝立皇子璉爲江都王璘爲江  
夏王璆爲宜春王宣帝子廬陵公玠爲南陽王封東海  
爲廣德王江濱廣源王淮濱長源王馬當上水府寧江  
王采石中水府定江王金山下水府鎮江王二月丁丑  
朔日食庚辰遣通事舍人劉傳忠使于唐唐臣安重誨  
以我國抗禮遣使窺覷拒不受遂與之絕夏四月遣右  
雄武軍使苗璘靜江統軍王彥章攻楚岳州丙戌至君  
山進軍荆江口丁亥與楚人戰於道人磯我師大敗璘  
彥章皆被執戊戌徙封常山王濛爲臨川王五月遣使  
求和於楚楚以苗璘王彥章來歸六月辛巳南平王季

興復請稱藩帝進季興爵秦王秋八月乙未大赦閏月  
皇太后殂先是潤州有氣如虹五彩奪目有首如驢長  
數十丈環聽事而立行三周而滅占曰廳中將有哭聲  
然非州府之咎也至是以國哀發喪於此堂遂應之九  
月辛巳荆南敗楚兵於白田獲其岳州刺史李廷規等  
三十四人來獻俘冬十二月丙辰秦王季興薨帝以其  
子從誨爲鎮南節度使兼侍中

太和元年秋八月武昌節度使兼侍中李簡以疾求還  
江都癸丑卒於采石徐知詢表薦簡子彥忠繼任徐知  
誥以龍武統軍柴再用代之冬十月知詢與知誥爭權

召知誥詣金陵除父溫喪知誥稱帝命不許是時知詢握兵據上流行多驕恣吳越王鏐遺知詢金玉鞍勒器皿皆飾以龍鳳知詢不復爲嫌竟乘用之

路振九國志以爲錢宏佐

所遺非也

由是意輕知誥內相猜忌知詢典客周廷望說知

詢曰公誠能捐寶貨以結朝中勳舊使皆歸心於公則

彼誰與處知詢從其言使廷望如江都諭意廷望與知

知誥知詢原

誥親吏周宗善密輸欵於知誥亦以知誥陰謀告知詢

本同應倒轉否

宗常語廷望人言侍中有七事宜亟來朝謝至是廷望

歸十一月知詢入朝知誥誣其有反狀留之不遣遷統

軍領鎮海軍節度使禽廷望斬之遣右雄武都指揮使